

KOSMA labur RM13 juta laksana projek tenaga solar

ROMPIN: Koperasi Serbausaha Makmur Berhad (KOSMA) melabur sebanyak RM13 juta menerusi pelaksanaan projek tenaga solar berskala besar, sekali gus mencipta dua pencapaian unik berpotensi disenaraikan dalam Malaysia Book of Records (MBOR).

Pelaburan tersebut memberi manfaat kepada lebih 1,200 pekerja ladang warga Indonesia dan Bangladesh yang menikmati kemudahan bekalan elektrik berasaskan tenaga solar selama 24 jam sejak dua tahun lepas setaraf kawasan bandar dan pinggir bandar, meskipun menetap jauh di kawasan pedalaman ladang sawit di Keratong.

Pencapaian tersebut bukan sahaja mengukuhkan kedudukan KOSMA sebagai peneraju koperasi berteraskan tenaga hijau, malah meletakkan koperasi itu sebagai perintis penggunaan teknologi lestari dalam

sektor perladangan negara.

Pengerusi KOSMA, Datuk Zamri Mohamed berkata, dua pencapaian berkenaan ialah pembinaan mesin pengeluaran wang automatik (ATM) pertama di kawasan ladang sawit di Malaysia serta pengoperasian ATM tersebut sepenuhnya menggunakan tenaga solar hasil kerjasama strategik dengan RHB Bank.

Menurut beliau, projek tenaga solar itu dibangunkan bagi menyalurkan bekalan elektrik ke Kompleks Perladangan KOSMA dan kediaman pekerja ladang, sekali gus memberi manfaat langsung kepada pekerja asing yang sebelum ini bergantung sepenuhnya kepada penggunaan genset diesel.

“Projek yang dimulakan pada Mei 2023 ini bukan sahaja memastikan kebajikan pekerja lebih terjamin, malah meningkatkan kualiti kehidupan mereka yang kini menikmati bekalan elektrik stabil seperti

di kawasan bandar walaupun berada jauh di pedalaman,” katanya kepada *Utusan Malaysia*.

Beliau berkata demikian selepas menerima kunjungan hormat Pengerusi Suruhanjaya Koperasi Malaysia (SKM) Pahang, Mohd. Firdaus Shaari di Kompleks Perladangan KOSMA di sini.

Zamri berkata, penggunaan tenaga solar membolehkan KOSMA menjimatkan kira-kira RM300,000 sebulan berbanding kos terdahulu sekitar RM5,000 sehari yang terpaksa ditanggung melalui penggunaan enjin diesel bagi membekalkan elektrik kepada kediaman pekerja dan kakitangan ladang.

“Projek ini dibangunkan di kawasan seluas 43,560 kaki persegi termasuk pemasangan panel solar di atas bumbung bangunan, sekali gus membolehkan bekalan elektrik disalurkan secara berterusan selama 24 jam,” jelasnya.